

'Yo soi la resurrección y la vía'

DOMINGU QUINTU. Cuaresma. Ciclu A.

MONICIÓN PA EMPRINCIPIAR: El domingu paséu, Xesús decía: 'Yo soi la tchuz del mundu'. Y quitói la ceguera a ún, curó a un ciigu de nacimiintu, dandoi tamién la fe nÉl... Hoi dizmos: 'Yo soi la resurrección y la vía'. Y Lázaru, que fedía porque tchevaba ya cuatro dís muirtu, resucitó... La resurrección de los muertos ye un puntu principal de la fe. Ye algo mui serio na vía de caún. Que la tierra sea reonda o que se paeza a una pera, nu importa muncho. Pero la fe na resurrección tien que ver con el camín que tien que tchevar caún, con el sitiü pa onde tien que amirar, con el cómo tien que comportase.

ACTU DE ARREPENTIMIINTU: Antes de acercamos al Dios buinu, reconozamos los nuestros pecaos:

-Por faltamos fe y seguriá nes promeses que Dios mos dio a conocer en Xesús. Señor, ten piedá.

-Por nun tratar a Xesús como al Salvaor. Cristu, ten piedá.

-Por vivir como si nun fuéramos a resucitar. Señor, ten piedá.

ORACIÓN: Pedímoste, Señor Dios nuistru, que la to gracia mos ayúe a vivir siempre del amor que tchevó al to Fiyu a morrer por la salvación de tós. Por Xesucristu el Señor nuistru. Amén.

PRIMER TCHETURA. Por muirtu y enterréu que tea el puiblu, por dividíu y disperdiguéu que se atope, Dios va facer que reviva, y que vuelva a tar entchinu de espíritu.

Del Tchibru de Ezequiel. 37, 12-14. "El Señor mándame a decivos esto: «Puiblu mió, Yo voy a encargame de cavar la poza na que tais enterraos, y voy facer que salgáis de etcha, y a tchevavos otra vuelta a la tierra de Israel. Y depués de abrivos la poza y sacavos de etcha, vais a saber bien que yo soy el Señor: voy a mandavos el mio espíritu y volveréis a vivir; tchevarevos a vuestra tierra, y entós vais a saber que yo el Señor lo digo y lo fago. Oréculu del Señor.»" PALABRA DE DIOS.

SELMU RESPONSORIAL: Tós: El Señor tien misericordia y trai salvación abonda.

-Desde lo más fondo, Señor, doite gritos; Señor, oye les voces que te doi: que tos oyíos atiendan a lo que pido.

-Si nun mos perdonas les maldaes, Señor, ¿qué va ser de nosotros? Pero xunto a ti ta el perdón, y venerámoste por eso.

-La mio alma espera nel Señor, fíase de la so palabra; la mio alma espera al Señor, más que el vixilante al amanecer. Que Israel espere al Señor como el vixilante al amanecer.

-Porque'l Señor tien misericordia, y trai salvación abonda, y él va a tchibrar a Israel de toes les sos maldaes.

SEGUNDA TCHETURA. Si el Espíritu del que resucitó a Xesús dente los muertos ta en vosotros, el que resucitó dente los muertos a Cristu Xesús darayos tamién vía a los vuestros cuerpos mortales.

De la Carta de san Pablu a los Romanos. 8, 8-11. "Hermanos: Si vos dexáis tchevar de la carne nun vais poer contentar a Dios. Pero vosotros nun vos dexáis tchevar de la carne, ye'l espíritu el que vos mueve, pos ta en vosotros el Espíritu de Dios. El que nun tien el Espíritu de Cristu nun ye de Cristu. Pero si Cristu ta en vosotros, por más que'l cuirpu vaya a morrer por mor del pekéu, el espíritu seguirá vivu porque tais en gracia de Dios. Y si el Espíritu del que resucitó a Xesús dente los muertos ta en vosotros, el que resucitó dente los muertos a Cristu Xesús darayos tamién via a los vuestros cuerpos mortales; faralo gracias al so Espíritu que ya ta en vosotros". PALABRA DE DIOS.

EVANXELIU. Dixo Xesús: 'Yo soi la resurrección y la vía; el que cre en mí, aunque muerra, va vivir; y el que ta vivu y cree en mí, nun va morrer pa siempre'.

Tchetura del sentu Evanxeliu según san Xuan. 11,1-45. "Naquel tiempu, había un home que se tchamaba Lázaru, taba melu. Yera de Betania, el puiblu de María y de la so hermana Marta. Esta María foi aquetcha que tchavó con colonia los pies de Xesús y que i los enxugó con les sos guedeeyes. Les dos hermanes mandároni avisu a

Xesús, diciendoi: «Señor, el to amigu ta melu.» Xesús, al oyer eso, dixo: «Ta melu, pero nun ye pa morrer: ye pa gloria de Dios, pa que la xente conoza la gloria del Fiyu de Dios.» Xesús yera muy amigu de Marta, de la so hermana y de Lázaru. Aunque se enteró de que Lázaru taba melu, queose tovía dos dís onde taba. Foi entós cuando dixo a los sos discípulos: «¡Vamos otra vuelta pa Xudea!» Los discípulos contestároni: «Maístru, va poco que casi te matan a pedraes los xudíos, y ¿quies dir otra vuelta pa tchi?» Responduyos Xesús: «Son doce les hores del día pa trabayar. Si ún anda de día, nun tien por qué tropezar, porque hay tchuz que lu atchume; cuando ya ye de nuiche ye cuando pues tropezar, porque vas a escures.» Poco más terdi díxoyos: «Lázaru el amigu nuistru adormezuse; voy a despertetchu.» Los discípulos dixéroni: «Si ta durmiendo ye que va a sanar.» Xesús había quería deciyos que taba murtu, y etchos habían entendío que sólo taba durmiendo. Por eso Xesús díxoyos bien a les clares: «Lázaru morrú, y alégrome por vosotros de nun haber tao atchí, pa que asina creáis. Vamos pa onde ta él.» Entós Tomás, al que tchamaban el xemilu díxoyos a los otros discípulos: «¡Vamos tamién nosotros a morrer con él!» Cuando tchegó Xesús, Lázaru ya tchevaba cuatro dís murtu... Betania quea a casi dos kilómetros y midiu de Xerusalén, y habían tchegao muchos xudíos a dayos el pésame a Marta y María por la muerte del so hermenu. Ná más saber Marta que Xesús taba de camín, salú a la escontra dél, mientras que María queose en casa. Y dixoi Marta a Xesús: «Señor, si aportas a tar tú aquí, nun taría murtu el mio hermenu. Pero tó lo que i pidas a Dios, toi segura de que va dátelo.» Xesús contestó: «El to hermenu va resucitar.» Marta respondió: «Sé que va resucitar na resurrección del últimu día.» Xesús dixoi: «Yo soy la resurrección y la vía: el que cree en mí, aunque muerra, va a vivir; y el que ta vivu y cree en mí, nun va morrer pa siempre.

¿Créelo?» Etcha contestói: «Sí, créolo, pos creo que tú yes el Mesíes, el Fiyu de Dios, el que día venir al mundu.» Depués Marta foi a catar a María, y dixoi al oyíu: «Ta aende el Maístru, y quier que vayas.» Oyer eso, tchevantase María y dir a la escontra de Xesús, foi tó uno... Nun había tchegao tovía al puiblu, pos seguía nel sitiú nel que se había atopao con Marta. Los xudíos que taban dando el pésame a María, al ver que salía apriesa, pensaron que día a tchorar a la sepultura, y fueron tras detcha. María tchegó aonde taba Xesús, echosei a los pies y dixoi: «Señor, si aportaras haber tao aquí, nun taría muirtu el mio hermenu.»... Al ver que María y los xudíos que taban a co etcha taban tchorando, escombutchusei el alma a Xesús y preguntoyos: «¿Onde lu enterrestis?» Contestároni: «Ven a ver.» Xesús empezó a empapietchar. Los xudíos decían: «¡Cuánto lu quería!» Pero otros reburdiaban: «Si fexo ver a un ciigu, ¿por qué nun fexo ná pa que Lázaru nun morriera?» Xesús empapietchando como taba acercose a la sepultura que yera una cueva atapá con una piedrona, y mandoyos: «Quitái la piedra.» Marta, la hermana del muirtu, dixoi: «Señor, ya fiede porque va cuatro dís que morrú.» Contestói Xesús: «¿Nun te dixi ya que si crees vas ver la gloria de Dios?» Entós quitaron la piedra. Xesús, tchevantó los bueyos pal ciilu, y dixo: «Doite gracias, Padre, porque fixiste kesu a lo que te pedí; yo sé que tú óyesme siempre; pero refiérome agora a esta xente que ta aquí, pa que crean que yo soy el Mesíes.» Y tras decir esto, dixo muy fuerte: «Lázaru, ¡sal pa fuera!» Y salú el muirtu. Tenía los pies y les manes encanaos, y un suderiu enrodiéu a la cara. Xesús díxoyos: «Desatailu y dexailu andar.» Y muchos xudíos que habían venío a casa de María, al ver lo que fexo Xesús, creyeron nél". PALABRA DEL SEÑOR.

Cuando oyemos falar de resurrección, nun pensamos más que na resurrección de les persones. Pero na historia vemos tamién que Dios resucitó al so puiblu, y munches veces; hasta pue decide que tós los dís. Lo mesmo pue vese na historia del puiblu nuivu de Dios que ye la llesia. Nun ye ná difícil ver cómo pueblos enteros, emburriaos pol amor, encontraos na fe y na esperanza, vuelven a tchevantar cabeza, aunque hayan tao arruinaos, esgonciaos y sin fuerzas... El capítulu 37 del Profeta Ezequiel diz que Israel, muirtu y enterréu en tós los sentíos, va volver a vivir... Pero la resurrección ye, primero de tó, espiritual, y empieza ya cuando un home o un puiblu emprincipia a creer y a esperar que pue salir de la so ruina o muerte, pa tener una vía nueva. Sin tener fe en que se puea conseguir vía pa sí o pal puiblu, sin tar seguros de que'l amor y la unión van dayos ales pa pasar per riba de les dificultaes que se atopan nel camín, por grandes que etches sean, la muerte tien sitiú aseguréu; la pasiviá, el pesimismu, el fatalismu son la garantía de que nun va cambiar ná... Y la vía de la xente tien muncho que ver con la de los pueblos... Pa los profetes el que'l puiblu xudíu dexara de tener vía tenía la so razón de ser nos pecaos del prupiu puiblu, sobre tó de los sos dirixentes: decían que yera eso porque se habían dexao tchevar al cultu de dioses estraños (porque habían dexao de creer na unión y el esfuirzu pa pensar que la fuerza y les riquezas dían a ser la so salvación, y así facíanse amigos de los pueblos grandes que nun tardarían en volverse los sos opresores) y habían escoyío la inxusticia y la desibualdá... Si vemos la práctica política (la tchabor de los pastores del puiblu) a como vían los profetes la práctica política del so tiimpu, de segures que mos paez que les sos palabres valen tamién pa denunciar el entreguismu de los dirixentes asturianos a poeres estraños (sean de Madrid, Barcelona, Bruseles, Washington), como si nun supieran que 'Roma nun paga traidores' y que la vía del puiblu nun pue promovese si a isi puiblu se i quita la responsabilidá y se i matan les iniciativas. Pero pue pensase sobre tó que valen pa los que se tchaman directores de la economía (tcheéi nisti sentíu el c. 34 del profeta Ezequiel, pensando lo que puean valimos les

so enseñanzas pa los que vivimos n'Asturies). Los profetes, a la vez que dicen que nin Dios nin etchos tan de acuirdu con les prácticke polítike de los dirixentes, tamién dicen que Dios tien un plan pa que'l puiblu vuelva a tener el tipu de vía que merez y quier. Nisi plan los homes van tener que comportase de un moo muy distintu de a como lo taban faciendo: van a ser los protagonistas de la so historia, nun van a tener que agachase más delante de los otros pueblos, y van ser hermanos, nunca esplotaores, de los otros. Nisi plan de Dios caben tós; más tovía: tós han de ser protagonistas, y han de quere se, y arranar por que haya xusticia, y ser capaces de trabayar y sacrificase pal bien de tós. ¿Queremos y catamos isi plan de Dios pa Asturies?

1) La xente diz que los pueblos nun tienen vía, que tan morriendo. ¿Por qué dirán eso? ¿En qué se nota?

2) Xesús acercase a la sepultura de Lázaru y mandoyos que quitaran la piedra ¿Cuáles son les 'piedres' que tranca el sepulcru de un puiblu? ¿Qué ye lo que nun dexa a un puiblu tener vía?

3) ¿Qué tien que creer un puiblu pa nun morrer? ¿Los poblaores tendrán que ver con la vía o muerte del puiblu?

4) El Cristu con que mos atopamos, ¿será quién pa dayos vía a los pueblos, o nun podrá dayos más que resinación y paciencia, pa que tengan una 'bona muerte'?

5) ¿Qué papel mos señala Cristu na resurrección de los pueblos? ¿Será menester que tamién nosotros tengamos que 'volver a nacer' pa que lo puean facer los pueblos?

REFLESIÓN: La resurrección de Lázaru ye la última de les siete señales que fexo Xesús y que cuenta san Xuan nel so evanxeliu. Pue decise que ye la cimera deses señales, porque mos diz que la vía apué a la muerte. Xesús apúola... El capítulu 11 de Xuan trai nel medio tres escenes: Xesús fala con Marta (Xn 11,17-27), atópase con María (Xn 11,28-37) y la resurrección de Lázaru (Xn 11,38-44). Primero deso, ponmos sobre avisu de lo que va pasar y preséntamos a los protagonistas (Xn 11,1-16)... P'acabar, estraña bastante que'n ve de contamos lo que pasó con Lázaru y les sos hermanes, dizmos que unos de los xudíos que taban atchí, creyeron en Xesús, pero que otros decidiéronse a matetchu... Antes que ná, dizmos Xesús que les señales que fai son pa que la xente se dea cuenta de lo grande y buinu que ye Dios (Xn 11,4) y pa que crean n'Él (11,15). Son dos idees que se atopan en tós los milagros, desde'l primiru ('dio a conocer asina la so gloria, y los sos discípulos creyeron en Él' Xn 2,11) hasta el últimu... La idea de la fe apaez sobre tó nel capítulu 20 cuando diz que tóes les señales que tan escrites nel evanxeliu son 'pa que creáis que Xesús ye'l Cristu, el Fiyu de Dios, y pa que, creyendo, tengáis vía nel so nome' (Xn 20,31)... El asuntu que mos cuenta pasó en Betania, un pueblín que ta cercina de Xerusalén. Día cuatro dís que habían enterrao a Lázaru. Xesús atrasose a posta, pa que la xente supiera que Lázaru taba muiрту y se viera bien el milegru que día facer. Había muncha xente dándoyos el pésame a les dos hermanes. Eso quier decir que fueron muchos los testigos de lo que pasó; y lo necios que fueron los que se emperraron en nun creer en Xesús... Marta foi la que salú a la escontra de Xesús. Dixoi: 'Señor, si aportas haber tao aquí, nun taría muiрту el mio hermenu. Pero tó lo que i pidas a Dios, toi segura que va dátelo' (Xn 11,21). Ta dolía por lo del hermenu, pero vese lo

confiá que ta. Más terdi, María dixo lo mesmo (Xn 11,32). Pero les palabres de Marta paez que tan entchenes de la esperanza de que Dios tien remidiu pa tó. Foi la esperanza la que la tchevó a dexar sóla a la so hermana pa dir a atopase con Xesús... Marta, ibual que muchos xudíos, creía 'na resurrección del últimu día' (11,24). Pero les coses cambian cuando entiende lo que Xesús i diz: lo que etcha espera ta tchegandoi entós na persona de Xesús: 'Yo soi la resurrección y la vía' (Xn 11,25). La vía eterna ye promesa pa los que morrieron, pero yelo tamién pa los que viven. La vía eterna nun ye sólo pa depués de morrer; la muerte nun ye más que un trance pel que tós tenemos que pasar. Les palabres de Xesús falan de vía eterna, de que la muerte ya queó sin poer: morrer ya nun ye pa siempre... Lo que Xesús diz tien mucho que ver con la fe, y dai seguriá a la esperanza del que cree. El que cree en Xesús, tea vivu o tea murtu, nun va morrer pa siempre, porque Dios mandó al so Fiyu al mundu pa que tengan vía pa siempre tós los que crean nÉI (Xn 3,15-16). Ye lo que Xesús i pregunta a Marta: '¿Créelo?' Lo que contesta Marta paezse a lo que contestaron los discípulos cuando yos preguntó Xesús si

tamién etchos lu querían dexar (Xn 6,67-69). La fe de Marta crez al oyer lo que i oyó a Xesús. Ya nun se trata de esperar al 'últimu día' pa saber qué ye lo que mos espera a los humanos. En Xesús, con el que taba falando, tchega la resurrección y la vía que nun se va acabar. La vía eterna nun ye la esperanza de un futuru que quea mui tchuiñe; ye algo que emprincipia desde agora pal que cree en Xesús. Tener fe ye creer en Xesús y tar seguru de que ye verdá lo que mos promete. Ye ponemos nes manes de Dios. Tener fe ye creer en Cristu, fiase dÉI, enfotase nÉI. Y porque mos fiamos dÉI, tamos seguros de que ye verdá lo que diz... Xuan ponmos delante a un Xesús que vieno a revelamos al Padre y a decimos cuál ye'l so plan de salvación pa los homes. Dios ta de parte de la vía, y en contra de la muerte y de lo que tcheva a morrer -pekéu, inxusticia, desamor-. Pa damos a saber eso valuse de señales milagroses y de palabres. Señales y palabres que dicen que Xesús ye'l Mesías, el Fiyu de Dios.

CREO: Digamos bien alto lo que creemos:

-¿Creéis que Dios ye'l Padre buinu de tós?

-¿Creéis que Xesús de Nazaré ye'l Fiyu de Dios fichu home?

-¿Creéis que Xesús ye la resurrección y la vía?

-¿Creéis que Xesús ya apúo a la muerte y que tós vamos a resucitar?

-¿Creéis que'l Espíritu que resucitó a Xesús dente los muertos ye'l que mos va resucitar a tós?

-¿Creéis que la muerte nun ye más que la puerta pa entrar a la vía que nun se acaba?

Ésta ye la nuestra fe: la que mos da la seguriá de la vía eterna y del Reinu que esperamos; la que mos tcheva a ponemos confiaos nes manes de Xesús; la que mos pon contra lo que nun dexa vivir a los homes.

ORACIÓN DE LOS FIELES: Pidámosi xuntos a Dios:

-que tengamos un tretu personal con Xesús de Nazaré.

-que tengamos seguríá no que Dios mos promete, y mos avecemos a ver que Él dizlo y failo.

-que mos dexemos tchevar del Espíritu de Xesús que ya ta en nosotros.

-que creamos que Xesús ye la resurrección y la vía.

-que mos pongamos contentos y confiaos nes manes de Cristu.

-que i déamos gracias a Dios por Cristu el Señor nuistru.

ORACIÓN: Dios que lo apués tó, Tú que mos regaliste la fe cristiana, óyemos, y atchímpiamos de pecaos gracias a isti sacrificiu que te ofrecemos. Por Cristu el Señor nuistru. Amén.

PREFECIU: Señor, Padre sentu, Dios que lo apués tó y que vives pa siempre, mereces que te déamos les gracias y tamos obligaos a dáteles siempre y en tós los tchaos, porque Cristu el Señor nuistru, que tchoró, como home mortal que yera, al saber que Lázaru, el so amigu, taba murtu, y como Dios y Señor de la vía lu tchevantó de la sepultura, esparde hoi la so compasión a tós los homes, y valse de los sacramentos pa dayos una vía nueva. Por eso cántante contentos tó la eterníá los mesmos ánxeles, y nosotros axuntamos les voces nuestres con les de etchos, cantando con homildá pa emponderate:

COMUNIÓN: 'Convenceivos de que si el grenu de trigu que cai en tierra nun muere, nun da ná; pero si muere, entós sí va dar muncho' (Xn 12, 24-25).

ORACIÓN: Señor que lo apués tó, pedímoste que cuentes siempre ente los miembros de Cristu a los que comulguemos con el so Cuirpu y la so Sangre. Por Cristu el Señor nuistru. Amén.

DESPEDÍA: Decía el profeta Ezequiel: 'Depués de abrivos la poza y sacavos detcha, vais a saber bien que Yo soi el Señor' (Ez 37,12-13). El creyente reconoz el señoríu de Dios porque lu va a resucitar. Tenemos que avezamos a oyer la voz del que 'lo diz y lo fai' (Ez 37,14)... Na Carta a los Romanos (Rm 7,24)S. Pablu pregúntase: '¿Quién dirá a tchibrame disti cuirpu y de la muerte que tchevo en mí?' Y hoi dizmos: 'Faralo Dios gracias al so Espíritu que ya ta en vosotros' (Rm 8,11). Ye'l Espíritu que mos tcheva a morrer al pekéu, a la lei, al egoísmu, a la desesperanza... Porque'l creyente va morriendo a munches coses... Desde que tenemos el Espíritu en nosotros, tó. Nun pensamos más que en ser como a Dios i gusta... Y morrer ye como salir de casa pa ponemos al sol.